

02/06/2001

Asas pakatan strategik

Manja Ismail in Jakarta

SYARIKAT petroleum nasional Indonesia, Pertamina, menyifatkan kerjasama eratnya dengan Petronas sejak beberapa tahun kebelakangan, sebagai asas pakatan strategik yang memungkinkan mereka menjadi gergasi dalam industri petroleum dan gas, khususnya di Asia.

Malah, Presiden Pengarah merangkap Ketua Eksekutif Pertamina, Baihaki Hakim berkata, Petronas menjadi pilihan pertama untuk mengembangkan sektor runcitnya di Indonesia apabila proses liberalisasi industri petroleum dan gas republik ini selesai.

"Embryo (benih) ke arah itu (pakatan strategik) sudah terbentuk melalui kerjasama dan komitmen sekarang terutama antara Pertamina, Petronas dan Brunei," katanya dalam satu pertemuan di Jakarta.

Perdana Menteri, Datuk Seri Dr Mahathir Mohamad, ketika merasmikan Pejabat Petronas Jakarta petang kelmarin yakin kerjasama lebih erat di antara Petronas dan Pertamina bukan saja menguntungkan mereka, malah memanfaatkan rakyat kedua-dua negara.

Presiden Petronas, Tan Sri Hassan Merican pula berpendapat, keperluan untuk dua syarikat minyak nasional itu membentuk pakatan strategik semakin mendesak bagi survival mereka dalam menghadapi globalisasi dan persaingan dengan gergasi industri minyak dan gas dunia.

Baihaki berkata, Indonesia ketika ini dalam proses meminda undang-undang bagi liberalisasi itu dan beliau menjangkakan Petronas boleh mula memasuki sektor runcit republik ini pada 2003.

"Dalam rencana kita, Petronas memang akan diundang menyertai sektor runcit di sini, jika tidak sendirian, mungkin secara usaha sama dengan Pertamina.

"Malah, kita sekarang banyak belajar daripada pengalaman dan kejayaan Petronas dalam sektor runcit," katanya.

Pertamina, selain antara syarikat minyak tertua di Asia, adalah yang terbesar dari segi aset dan simpanan minyak mentah, manakala Petronas diakui dalam industri sebagai salah sebuah syarikat minyak dengan pengurusan terbaik dan disenaraikan dalam Fortune 500.

Baru-baru ini, Petronas menandatangani perjanjian penjualan gas dengan Pertamina bagi membeli sehingga 250 juta kaki padu gas asli sehari selama 20 tahun dari Natuna Barat, yang akan dihantar melalui kemudahan pesisir Duyong ke Semenanjung Malaysia, pada Ogos 2002.

Dalam konteks kerjasama Asean juga, katanya, Petronas, Pertamina dan PetroVietnam baru saja membentuk satu pakatan strategik untuk menerokai peluang dalam sektor hiliran di ketiga-tiga negara itu dan juga negara lain.

Di sektor hulu, Petronas terus membekalkan minyak mentah dan produk petroleum kepada Pertamina serta mengkaji kemungkinan melabur dalam projek pembesaran loji penapisan dan perniagaan runcit.

Petronas juga membekalkan minyak mentah kepada Pertamina secara kontrak dan mengeksport produk petroleum lain ke Indonesia.

(END)